

T 2511
8243

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

后為太皇太后光大二年
后下令黜廢帝為臨海
宣帝嗣立大建元年復
皇太后二年三月丙申
紫極殿時年六十五其
四月群臣上謚曰宣祔葬萬
安陵后親屬無在朝者唯
本族兄鈕洽官至中散大夫
文沈皇后諱妙容吳興武
康人也父法深梁安南中錄
事參軍后年十歲餘以梁
大同中歸于文帝武帝之討
侯景文帝時在吳興及后
並被收景平乃獲免武帝踐
阼后為臨川王妃文帝即位
為皇后追贈后父法深光
祿大夫加金章紫綬封建
城縣侯謚曰恭追贈后母高



為綏安縣君謚曰定廢帝即位尊后為皇太后宮曰安德時宣帝與僕射到仲舉舍人劉師知等並受遺輔政師知與仲舉恒居禁中參決衆事而宣帝為揚州刺史與左右三百人入居尚書省師知忌宣帝權重矯勅令還東府理州務宣帝將出毛喜止之曰今若出外便受制於人如曹爽願作富家公不可得也宣帝乃稱疾召師知留與語使毛喜先入言之於后后曰今伯宗年幼政事並委二郎此非我意又言於廢帝廢帝曰此自師知等為非朕意也喜出報宣帝帝因囚師知自入見后

及帝極陳師知之短仍自草勅請畫以師知付廷尉其夜於獄賜死自是政歸宣帝后憂悶計無所出乃密賂宦者蔣裕令誘建安人張安國使據郡反冀因此圖帝安國事發被誅時后左右近侍頗知其事后恐連逮黨與並殺之宣帝即位以后為文皇后陳亡入隋大業初自長安歸于江南頃之平后兄欽襲爵建城侯位尚書左僕射欽素無技能奉已而已卒謚曰成子觀嗣頗有學識官至御史中丞

廢帝王皇后琅邪臨沂人天嘉元年為皇太子妃廢帝

即位立為皇后廢帝為臨海王后廢為妃至德中薨后
生臨海嗣王至澤至澤光大元年為皇太子大建元年
襲封臨海嗣王陳亡入長安后父固自有傳

宣柳皇后諱敬言河東解縣人也曾祖世隆祖暉父偃
並有傳后九歲幹理家事有若成人侯景之亂后與弟
盼在江陵依梁元帝帝以長城公主故待遇甚厚以配
宣帝承聖二年后生後主於江陵及魏剋江陵宣帝遷
于關右后與後主俱留穰城天嘉二年與後主還朝后
為安城王妃宣帝即位立為皇后后美姿容身長七尺

二寸手垂過膝初宣帝居鄉里先娶吳興錢氏及即位
拜為貴妃甚有寵后傾心下之每尚方供奉物其上者
皆進於貴妃而已御其次焉宣帝崩始興王叔陵為亂
後主賴后與吳媪救而獲免後主即位尊后為皇太后
宮曰弘範是時新失淮南地隋師臨江又國遭大喪後
主愚創不能聽政其誅叔陵供大行喪事邊境防守及
百司衆務雖假後主之勅實皆決之於后後主創愈乃
歸政焉后性謙謹未嘗以宗族為請雖衣食亦無所分
遺陳亡入長安隋大業十二年薨于東都年八十二葬

于洛陽之芒山

後主沈皇后諱發華吳興武康人儀同三司蔡侯君理之女也君理自有傳母即武帝女會稽穆公主主早亡后尚幼而毀瘠過甚及服畢每歲時常獨坐涕泣哀動左右内外敬異焉太建三年拜為皇太子妃後主即位立為皇后后性端靜有識量寡嗜慾聰敏彊記涉獵經史工書翰後主在東宮而后父君理卒居憂處別殿良毀逾禮後主遇后既薄而張貴妃有寵總後宮之政后澹然未嘗有所忌怨而居處儉約無錦繡之飾左右近侍

纔百許人唯尋閱圖史及釋典為事嘗遇歲旱自暴而誦佛經應時雨降無子養孫姬子胤為已子數上書諫爭後主將廢之而立張貴妃會國亡不果乃與後主俱入長安及後主薨后自為哀辭文甚酸切隋煬帝每巡幸常令從駕及煬帝為宇文化及所害后自廣陵過江還鄉里不知所終或言過江於毗陵天靜寺為尼名觀音貞觀初卒張貴妃名麗華兵家女也家貧父兄以織席為業後主為太子以選入宮時龔貴嬪為良姊貴妃年十歲為之給使後主見而悅之因得幸遂有娠生太

子深後主即位拜為貴妃甚被寵遇後主與賓客游宴
貴妃薦諸宮女預焉後宮咸德之競言其善由是愛傾
後宮又工厭魅之術假鬼道以惑後主置淫祀於宮中
聚諸女巫使之鼓舞因參訪外事人間有一言一事妃
必先知之以白後主後主由此益重之故內外宗族多
被引用大臣執政亦從風而靡及隋軍克臺城妃與後
主俱入于井隋軍出之晉王廣命斬妃於青溪中橋史
臣侍中鄭國公魏徵考覽記書參詳故老云後主初即
位以始興王叔陵之亂被傷卧于承香閣下時諸姬並

不得進唯張貴妃侍焉而柳太后猶居柏梁殿即皇后
之正殿也沈皇后素無寵不得侍疾別居求賢殿至德
二年乃於光昭殿前起臨春結綺望仙三閣閣高數十
丈並數十間其牕牖壁帶懸楣欄檻之類並以沈檀香
木為之又飾以金玉間以珠翠外施珠簾內有寶牀寶
帳其服玩之屬瑰竒珍麗皆近古未有每微風暫至香
聞數里朝日初照光映後庭其下積石為山引水為池
植以竒樹雜以花藥後主自居臨春閣張貴妃居結綺
閣龔孔二貴嬪居望仙閣並複道交相往來又有王季

二美人張薛二淑媛袁昭儀何婕妤江脩容等七人並有寵遞代以遊其上以宮人有文學者袁大捨等爲女學士後主每引賓客對貴妃等游宴則使諸貴人及女學士與狎客共賦新詩互相贈答採其尤豔麗者以爲曲調被以新聲選宮女有容色者以千百數令習而歌之分部迭進持以相樂其曲有玉樹後庭花臨春樂等其略曰璧月夜夜滿瓊枝朝朝新大指所歸皆美張貴妃孔貴嬪之容色張貴妃髮長七尺鬢黑如漆其光可鑒特聰慧有神彩進止閑雅容色端麗每瞻視眄睐光

彩溢日照映左右嘗於閣上靚粧臨于軒檻宮中遙望飄若神仙又才辯彊記善候人主顏色是時後主怠於政事百司啓奏並因宦者蔡臨兒李善度進請後主倚隱囊置張貴妃於膝上共決之李蔡所不能記者貴妃並爲疏條無所遺脫由是益加寵異後庭之家不遵法度有結於理者但求恩於貴妃貴妃則令李蔡先啓其事而後從容爲言之大臣有不從者因而譖之言無不聽於是張孔之權薰灼四方閹宦便佞之徒內外交結轉相引進賄賂公行賞罰無常綱紀瞽亂矣

後魏

自典午氏南遷下逮宋齊梁陳六宮制度前史言之審矣魏氏王業之兆雖基於神元而其時朝章國典百不一具故自昭成以前未有及內職之事章平思昭穆惠煬烈傳禪八君妃后無聞焉及道武建國始追尊祖妣皆從帝謚為皇后爰立中宮以配宸極中宮而下或稱夫人其負數多寡悉無準限然粗有品秩可以銓次太武統寓國家殷盛稍增左右昭儀及貴人椒房等自是後庭漸已充實矣又魏世故事將立皇后必令手鑄金

人以成者為吉不則不得立也又太武文成保母劬勞之恩並極尊崇之義雖事乖典禮而觀過知仁孝文改定內官左右昭儀位視大司馬三夫人視三公三嬪視三卿六嬪視六卿世婦視中大夫御女視元士後置女職以典內司視尚書令僕作司大監女侍中三官視二品監女尚書美人女史女賢人女書史書女小書女五品青衣女酒女饗女食奚官女奴視五品及齊神武文襄俱未踐尊極神武嫡妻稱妃其所聘茹茹女稱為茹

茹公主文襄既尚魏朝公主故無別號兩宮自餘姬侍
並稱娘而已文宣後庭雖有夫人嬪御之稱然未具貞
數孝昭內職甚少唯楊嬪才貌兼美復是貴家襄城王
母桑氏有德行並蒙恩禮其餘無所述河清新令內命
婦依古制有三夫人九嬪二十七世婦八十一御女又
準漢制置昭儀有左右二人比丞相其弘德正德崇德
為三夫人比三公光猷昭訓隆徽為上嬪比三卿宣徽
凝暉宣明順華凝華光訓為下嬪比六卿正華令則脩
訓曜儀明淑芳華敬婉昭華光正昭寧貞範弘徽和德

弘猷茂光明信靜訓曜德廣訓暉範敬訓芳猷婉華明
範豔儀暉則敬信為二十七世婦比從三品穆光茂德
貞懿曜光貞凝光範令儀內範穆閨婉德明婉豔婉妙範
德暉章敬茂靜肅章穆華慎儀妙儀明懿崇明麗則婉儀
彭脩閑脩靜弘明慎豔光猗容徽淑秀儀芳婉貞慎明豔
穆容脩範肅容茂儀英淑弘豔正信凝婉英範懷順脩媛
良則瑤章訓成潤儀寧訓淑懿柔則穆儀脩禮昭慎貞
媛肅閨敬順柔華昭順敬寧明訓弘儀崇敬脩敬承閑
昭容麗儀閑華思柔媛光懷德良媛淑猗茂範良信豔

華徽娥肅儀妙則為八十一御女比正四品武成好內
並具其貞自外又置才人采女以為散號後主既立二
后昭儀以下皆倍其數又置左右娥英比左右丞相降
昭儀比二大夫尋又置淑妃一人比相國周氏率由姬
制內職有序文帝創基脩衽席以儉約武皇嗣歷節情
欲於矯枉宮闈有貫魚之美戚里無私溺之尤可謂得
君人之體也宣皇外行其志內逞其欲溪壑難滿采擇
無厭恩之所加莫限廝阜榮之所及無隔險諛於是升
蘭殿以正位踐椒庭而齊體者非一人焉階房帷而拖

青紫緣恩幸而擁玉帛非一族焉雖辛癸之荒淫趙李
之傾惑曾未足比其髣髴也人厭苛政弊事實多文帝
之祀忽諸特由於此隋文思革前弊大矯其違唯后當
室傍無私寵婦官位號未詳備焉開皇二年著內官之
式略依周禮省減其數嬪三貞掌教四德視正三品世
婦九貞掌賓客祭祀視正五品女御三十八貞掌女功
絲枲視正七品又采漢晉舊儀置六尚六司六典遞相
統攝以掌宮掖之政一曰尚宮掌導引皇后及閨閣票
賜管司令三人掌圖籍法式糾察宣奏典琮三人掌琮

璽器玩二曰尚儀掌禮儀教學管司樂三人掌音律之事典贊三人掌導引內外命婦朝見三曰尚服掌服章寶藏管司飾三人掌簪珥花嚴典擲三人掌巾櫛膏沐四曰尚食掌進膳先嘗管司醫三人掌方藥卜筮典器三人掌鑄彝器皿五曰尚寢掌帷帳牀褥管司筵三人掌鋪設灑掃典執三人掌扇傘燈燭六曰尚工掌營造百役管司製三人掌衣服裁縫典會三人掌財帛出入六尚各三員視從九品六司視勲品六典視流外二品初文獻皇后功參歷試外預朝政內擅宮闈懷嫉妬之

心虛嬪妾之位不設三妃防其上逼自嬪以下置六十九員加又抑損服章降其品秩至文獻崩後始置貴人三員增嬪至九員世婦二十七員御女八十一員貴人等關掌宮闈之務六尚以下皆分隸焉煬帝時后妃嬪御無釐婦職唯端容麗飾陪從宴遊而已帝又參詳典故自製嘉名著之於今貴妃淑妃德妃是爲三夫人品正第一順儀順容順華脩儀脩容脩華充儀充容充華是爲九嬪品正第二婕妤一十二員品正第三美人才人一十五員品正第四是爲世婦寶林二十四員品正第

五御文二十四員品正第六采女三十七員品正第七是爲女御總一百二十以叙於宴寢又有承衣刀人皆趨侍左右並無負數視六品以下時又增置女官準尚書省以六局管二十四司一曰尚宮局管司言掌宣傳奏啓司簿掌名錄計度司正掌格式推罰司闡掌門閤管籥二曰尚儀局管司籍掌經史教學紙筆几案司樂掌音律司賓掌賓客司贊掌禮儀贊相導引三曰尚服局管司爾掌琮璽符節司衣掌衣服司飾掌湯沐巾櫛玩弄司仗掌仗衛戎器四曰尚食局管司膳掌膳羞司

醢掌酒醴醢醢司藥掌醫巫藥劑司饎掌廩餼柴炭五
曰尚寢局管司設掌牀席帷帳鋪設灑埽司輿掌輿輦傘扇執持羽儀司苑掌園籞種植蔬菜瓜果司燈掌火燭六曰尚工局管司製掌營造裁縫司寶掌金玉珠璣錢貨司綵掌繒帛司織掌織染六尚二十二司員各二人唯司樂司膳員各四人每司又置典及掌以貳其職六尚十人品從第五司二十八人品從第六典二十八人品從第七掌二十八人品從第九女史流外量局閑劇多者十人以下無定員數聯事分職各有司存焉

神元皇后竇氏沒鹿田部大人賓之女也賓臨終誡其
二子速侯田題令善事帝又賓卒速侯等欲因帝會喪
爲變語泄帝聞之晨起以佩刀殺后馳使告速侯等言
后暴崩速侯等來赴因執殺之

文帝皇后封氏生桓穆二帝早崩桓帝立乃葬焉文成
初穿天泉池獲一石銘稱桓帝葬母氏遠近赴會二十
餘萬有司以聞命藏之太廟次妃蘭氏是生思帝

桓皇后惟氏生三子長曰普根次惠帝次煬帝平文崩
攝國事時人謂之曰女國后性猛忌平文之崩后所
爲也

平文皇后王氏廣甯人也年十三因事入宮得幸於平
文生昭成帝平文崩昭成在襁褓時國有內難將害帝
子后匿帝於袴中呪曰若天祚未終者汝無聲遂良久
不啼得免於難昭成初欲定都於灑源川築城郭起宮
室議不決后聞之曰國自上世遷徙爲業今事難之後
基業未固若郭而居一旦寇來難卒遷動乃止烈帝之
崩國祚殆危興復大業后之力也崩葬雲中金陵道武
即位配饗太廟

昭成皇后慕容氏慕容皝之女也初帝納皝妹為妃未幾而崩皝復請繼好遣大人長孫秩逆后皝送于境上后至有寵生獻明帝及秦明王后性聰敏多智專夕理內每事多從初昭成遣衛辰辰姦猾終當滅汝悉勿祈死其之曰汝還必深防衛辰辰姦猾終當滅汝悉勿祈死其子果為衛辰所殺卒如后言建國二十三年崩道武即位配饗太廟

獻明皇后賀氏東部大人野干女也少以容儀選入東宮生道武苻洛之內侮也后與道武及故臣吏避難北

徙俄而高車來抄后乘車避賊而南中路失道乃仰天曰國家胤胄豈一爾絕滅也惟神靈扶助遂馳輪正不傾行百餘里至一山南而免難後劉顯使人將害帝帝姑為顯弟亢泥妻知之密以告后梁眷亦來告難后乃令帝去之后夜飲顯醉向晨故驚廐中群馬使起視馬后泣謂曰吾諾于始皆在此今盡亡矣汝等誰殺之故顯使不急追道武得至賀蘭部群情未甚歸附后從弟外朝大人悅舉部隨從供奉盡禮顯怒將害后后奔亢泥家匿神車三日亢泥舉室請救乃得免會劉顯

部亂始得亡歸後后弟染干忌道武之得人心舉兵圍
逼行宮后出謂染干曰汝等今安所置我而欲殺吾子
也染干慙而去後后少子秦王觚使于燕慕容垂止之
后以觚不反憂念寢疾皇始元年崩祔葬于盛樂金陵
後追加尊謚配饗焉

道武皇后慕容氏寶之子女也中山平入充掖庭得幸
左丞相衛王儀等奏請立皇后帝從儀令后鑄金人成
乃立之封后母孟為滎陽君後崩

道武宣穆皇后劉氏劉眷女也登國初納為夫人生華
公主後生明元后留守理內事寵待有加以鑄金人不
成故不登后位魏故中後官產子將為儲貳其母皆賜
死道武末年后以舊法薨明元即位追尊謚位配饗太
廟自此後宮人為帝母皆正配饗焉

明元昭哀皇后姚氏姚興女西平長公主也明元以后
納之後為夫人后以鑄金人不成未升尊位然帝寵禮
如后是後猶欲正位后謙不當泰恒五年薨帝追恨之
贈皇后爾璽綬而加謚焉葬雲中金陵

明元密皇后杜氏魏郡鄴人陽平王超之妹也初以良

家子選入太子宮者寵生太武及明元即位拜貴嬪泰
恒五年薨贈貴嬪薨於雲中金陵太武即位追尊號謚配
饗太廟又立廟于鄴刺史四時薦祀以魏郡太后所生
之邑復其調役後甘露降于廟庭文成時相州刺史高
閭表脩后廟詔曰婦人外成理無獨祀陰必配陽以成
天地未聞有莘之國立太妣之饗此乃先皇所立一時
之至感非經世之未遠制便可罷祀先是太武保母竇氏
初以夫家坐事誅與二女俱入宮操行純備進退以禮
明元命為太武保母性仁慈帝感其恩訓奉養不異所
生及即位尊為皇太后封其弟漏頭為遼東王太后訓
釐內外甚有聲稱性恬素寡欲喜怒不形於色好揚人
之善隱人之過帝征涼州蠕蠕入寇太后命諸將擊走
之太平真君元年崩詔天下大臨三日太保盧普元監
護喪事謚曰惠葬崑崙山從后意也初后嘗登崑崙山顧謂
左右曰吾母養帝躬敬神而愛人若死而不滅必不為
賤鬼然於先朝本無位次不可違禮以從園陵此山之
上可以終託吾葬焉別立后寢廟於崑崙山建碑頌德
太武皇后赫連氏屈丐女也太武平統萬納后及二妹

俱為貴人後立為皇后文成初崩祔葬金陵

太武敬哀皇后賀氏代人也初為夫人生景穆皇帝神
廟
廡元年薨追贈貴嬪葬雲中金陵後追號尊謚配饗太

景穆恭皇后鄴父閭氏河東王毗妹也少以才選入東
宮有寵生文成皇帝而薨文成即位追尊號謚葬雲中
金陵配饗太廟又文成乳母本遼西人因事入宮乳帝
有劬勞保護之功文成即位尊為保太后尋為皇太后
告於郊廟和平元年崩詔天下大臨三日謚曰昭葬以

廣甯磨笄山俗謂之雞鳴山太后遺志也依惠太后故
事別立寢廟置守陵二百家樹碑頌德

臣謹按以乳母而為皇太后行郊廟禮神其聽之乎
稱崩而使天下臨之人其哀之乎

文成文明馮皇后長樂信都人也父朗秦雍二州刺史
西城郡公母樂浪王氏后生於長安有神光之異朗坐
事誅后遂入宮太武左昭儀后之姑也雅有母德撫養
教訓年十四文成踐極以選為貴人後立為皇后文成
崩故事國有大喪三日之後御服器物一以燒焚百官

及中宮皆號泣而臨之后悲叫自投火中左右救之良久乃蘇獻文即位尊為皇太后丞相乙渾謀逆獻文年十三居于諒闇太后密定大計誅渾遂臨朝聽政及孝文生太后躬親撫養是後罷令不聽政事太后行不正內寵李弈獻文因事誅之太后不得意獻文暴崩時言太后為之也承明元年尊曰太皇太后復臨朝聽政后性聰達自入宮掖粗學書計及登尊極省決萬機孝文詔諸鷙鳥傷生之類宜放之山林乃罷鷹師曹以其地為太后立報德佛寺太后與孝文遊於方山顧瞻川阜有

山陵然後為貴哉吾百歲之後神其安此孝文乃詔有司營建壽陵於方山又起永固石室將為清廟焉太和五年起作八年而成刊石立碑頌太后功德太后以帝富於春秋乃作勸戒歌三百餘章又作皇誥十八篇太后性儉素不好華飾躬御縵繒而已宰人上膳案裁徑尺羞餽滋味十分減八太后嘗以體不安服菴閭子宰人昏而進粥有蠅蜒在焉后舉匕得之帝時侍側將加殛罰太后笑而釋之自太后臨朝專政帝雅性孝謹不

欲參決事無巨細一稟於太后太后多智猜忌能行大
事生殺賞罰決於俄頃多有不關帝者是以威福兼作
震動內外故杞道德王遇張祐苻承祖等拔自微闈歲
中而至王公王叡出入卧內數年之間便為宰輔賞賚
千萬億計金書鐵券許以不死之詔李冲以器能受任
亦由見寵帷幄密加賞賚不可勝數太后性嚴明假有
寵侍亦無所縱左右纖介之愆動加捶楚然性不宿憾
尋亦待之如初或因此更加富貴是以人人懷於利欲
至死而不思退太后曾與孝文幸靈泉池宴群臣及蕃

國使人諸方渠帥各令為其方舞帝上壽太后忻然作
歌帝亦和歌遂命群臣各言其志於是和歌者凡九十
人太后外禮人望元丕游明根等頒賜金帛輿馬每至
褒美叡等皆引丕參之以示無私又自以過失懼人議
已小有疑忌便見誅戮迄后之崩孝文不知所生至如
李訢李惠之徒猜嫌覆滅者十餘家死者數百人率多
枉濫天下寃之十四年崩於太和殿時年四十九其日
有雄雉集于太華殿帝勺飲不入口五日謚曰文明太
皇太后葬於永固陵帝毀瘠絕酒肉不內御者三年乃

於永固陵東北里餘營壽宮遂有終焉瞻望之志及遷洛邑乃自表灑西以爲山園之所而方山虛宮號曰萬年堂云

文成元皇后李氏梁國蒙縣人母頓丘王峻之妹也后之生也有異於常父方叔恒言此女當大貴及長資質美麗太武南征命永昌王仁出壽春軍至后宅因得后及仁鎮長安遇事誅后與其家人送平城宮高祖登白樓望見美之乃下臺后得幸於齊庫中遂有娠常太后後問后知之時守庫者亦私書於壁記之別加驗問皆

符同及生獻文拜貴人太安二年太后令依故事令后具條記在南兄弟及引所結宗兄洪之悉以付託臨決每一稱兄弟拊膺慟哭遂薨後謚曰元皇后葬金陵配饗太廟

獻文思皇后李氏中山安喜人南郡王惠之女也安德婉淑年十八以選入東宮獻文即位爲夫人生孝文帝皇興三年薨葬金陵承明元年追崇號謚配饗太廟

孝文貞皇后林氏平涼人也父勝位平涼太守叔父金閭起自閹宦獻文初爲定州刺史爲乙弗渾所誅及勝

兄弟皆死勝無子有二女入掖庭后容色美麗得幸於
孝文生皇子恂以恂將為儲貳太和七年后依舊制薨
帝仁恕不欲襲前事而稟文明太后意故不果行謚曰
貞皇后葬金陵及恂以罪賜死有司奏追廢后為庶人
孝文廢皇后馮氏太師熙之女也太和十七年孝文既
終喪太尉元丕等表以長秋未建六宮無主請正內位
孝文從之立后為皇后恩遇甚厚孝文後重引后姊昭
儀至洛稍有寵后禮愛漸衰昭儀自以年長且前入宮
掖素見待念輕后而不率妾禮后雖性不妬忌時有愧

恨之色昭儀規為內主口構百端尋廢后為庶人后貞
謹有德操遂為練行尼後終於瑤光佛寺

孝文幽皇后亦馮熙女以日常氏本微賤得幸於熙熙
元妃公主薨後遂主家事生后與比平公夙文明太皇
太后欲家世貴寵乃簡熙二女俱入掖庭時年十四其
一早卒后有姿媚偏見愛幸未幾疾病太后乃遣還家
為尼帝猶留意焉歲餘而太后崩帝服終頗存訪之又
聞后素疹痊除遣闈山雙三念璽書勞問之遂迎赴洛
陽宮及至寵愛過本似當夕宮人稀復進見拜為左昭

儀後立爲皇后帝頗歲南征后遂與中官高菩薩私亂及帝在汝南不豫后便公然醜恣中常侍雙蒙等爲其心腹是時彭城公主木王劉昶子婦也年小養居北平公馮夙后之同母弟也后求婚於孝文孝文許之公主志不願后欲彊之婚者日矣公主密與侍婢及僮從十餘人乘輕車冒霖雨赴懸瓠奉謁孝文自陳本意因言后與菩薩亂狀帝聞因駭愕未之信而秘匿之此後后漸憂懼與母常氏求託女巫禱厭孝文疾不起一旦得如文明太后輔少主稱命者賞報不貲又取三牲宮中祓禱假言祈福專爲左道母常或自詣宮中或遣侍婢與相報答帝至洛執問菩薩雙蒙等具得情狀帝以疾卧含溫室夜引后并列菩薩等於戶外后臨入令搜衣中稱有寸刃便斬后頓首泣謝乃賜坐東楹去御筵二丈餘孝文令菩薩等陳狀又讓后曰汝有祓術可具言之后乞屏左右有所密狀孝文勅中常侍悉出唯令長秋卿白整在側取衛直刀拄之后猶不言孝文乃以綿堅塞整耳自小語再三呼整無所應乃令后言事隱人莫知之孝文乃喚彭城北海二王令入坐言昔是汝嫂今便

他人但入勿避又曰此老嫗欲白刃插我肋上可窮問
本末勿有所難又云馮家女不能復相廢逐且使在宮
中空坐有心乃能自死汝等勿謂吾猶有情也帝素至
孝猶以文明太后故未行廢二王出乃賜后蘇死訣再
拜稽首涕泣及入宮後帝命中官有問於后后罵曰我
天子婦當面對豈令汝傳也帝怒勅后母常入示與后
狀常撻之百餘乃止帝尋幽伐后留京師雖以罪失寵
而夫人嬪妾奉之如法唯令太子在東宮無朝謁之事
帝疾甚謂彭城王勰曰後宮口久乖陰德自絕於天吾死
後可賜自盡別宮葬以后但庶掩馮門之大過帝崩梓
宮達魯陽乃行遺詔命北海王詳奉宣遺旨長秋卿白
整等入授后藥后走呼不許引決曰官豈有此也此是
諸王輩殺我耳整等執持彊之乃含椒而盡梓宮次洛
南咸陽王禧等知審死相視曰若無遺詔我兄弟亦當
作計去之豈可令失行婦人宰制天下殺我輩也謚曰
幽皇后葬長陵塋內

孝文文昭皇后高氏司徒公肇之妹也父賜母蓋氏凡
四男三女皆生於東齋孝文初乃舉室西歸近龍城鎮

鎮表后德色婉豔及至文明太后親幸北部曹見后竒
之入掖庭時年十三初后幼曾夢在堂內立而日光自
窓中照之灼灼而熱后東西避之光猶斜照不已如是
數夕怪之以白其父颺颺以問遼東人閔宗宗曰此竒
徵也昔有夢日入懷猶生天子况日照之徵此女將被
帝命誕育人君之象也後生宣武及廣平王懷樂安公
主馮昭儀寵盛密有母養帝心后自代如洛陽暴薨於
汲郡之共縣或云昭儀所賊也宣武之為皇太子二日
一朝幽后后拊念慈愛有加孝文出征宣武入朝必久

留后宮親視櫛沐母道隆備其後有司請加尊謚曰文
昭貴人孝文從之宣武踐阼追尊配饗后先葬在長陵
東南陵制卑狹乃改營山陵號終寧陵置邑戶五百家
明帝時更上尊號太后以同漢晉之典正姑婦之禮廟
號如舊文昭遷靈襯於長陵北內西北六十步初開終
寧陵數丈於梓官上獲大蛇長丈餘黑色頭有王字蟄
而不動靈襯既遷還置蛇舊處

宣武順皇后于氏太尉烈弟勁之女也宣武始親政事
烈時為領軍總心膂之任以嬪御未備左右諷諭稱后

有容德帝乃迎入為貴人時年十四甚見寵愛立為皇
后后靜默寬容性不妬忌生皇子三歲夭沒其後暴崩
宮禁事秘莫能知悉者世議歸咎于高夫人葬永泰陵
謚曰順皇后

宣武皇后高氏文昭皇后弟優之女也宣武納為貴嬪
生皇子早夭又生建德公主後拜為皇后甚見禮重性
妬忌宮人希得進御及明帝即位上尊號曰皇太后尋
為尼居瑤光寺非大節慶不入宮中建德公主始五六
歲靈太后出觀母武邑君時天文有變靈太后欲以當

禍是夜暴崩天下寃之喪還瑤光佛寺殯皆以尼禮初
孝文幽后之寵也欲專其愛後宮接御多見阻遏孝文
時言于近臣稱婦人妬防雖王者亦不能免况士庶乎
宣武高后悍忌嬪御有至帝崩不蒙待接者由是在洛
二十餘年皇子全者唯明帝而已

宣武靈皇后胡氏安定臨涇人司徒國珍女也母皇甫
氏產后之日赤光四照京兆山北縣有趙胡者善於卜
相國珍問之胡云賢女有大貴之表當為天下母生勿
過三人知也后姑為尼頗能講道宣武初入講禁中諷

左右言后有姿行帝聞之乃召入掖庭為充華世婦而椒庭之中以國舊制相與祈祝皆願生諸王公主不願生太子唯后獨曰豈畏一身之死而令皇家不育家嫡也及明帝在孕同列猶以故事相恐勸為他計后故意確然幽夜獨誓云但使所生是男次第當長子子生身死所不辭也既誕明帝進為充華嬪先是宣武頻喪皇子自以春秋長矣深加慎謹為擇乳保皆取良家宜子者養於別宮皇后及充華皆不得撫視焉及明帝踐阼尊為皇太妃尋尊為皇后臨朝聽政猶曰殿下下令他

事後改令稱詔群臣上書曰陛下自稱曰朕太后以明帝沖幼未堪親祭欲依周禮夫人與君交獻之義代行祭祀禮官博議以為不可而太后欲以悻慢自鄣觀三公行事重問侍中崔光光便據漢和熹鄧太后薦祭故事太后大悅遂攝行初祀太后性聰悟多才藝略通佛經大義親覽萬機手筆斷決幸西林園法流堂命侍臣射不能者罰之又自射針孔中之大悅賜左右布帛有差先是太后勅造申訟車時御焉出自雲龍大司馬門從宮西北入自千秋門以納冤訟又親策孝秀州郡計

吏於朝堂太后與明帝幸華林園宴群臣於都亭曲水
令王公以下賦四言詩太后詩曰化光造物含氣貞明
帝詩曰恭已無爲上賴慈英王公以下賜帛有差太后
父薨百寮表請公除太后不許尋幸永寧寺觀建刹於
九級之基僧尼士女赴者數萬人及改葬文昭高后太
后不欲令明帝主事乃自爲喪主出至終寧陵親奠遣
事還哭於太極殿至於訖事皆自主焉後幸左藏王公
嬪主從者百餘人皆令任力負布絹即以賜之陳留公
李宗章武王融並以所負過多顛仆於地語在李宗傳

又幸嵩高山夫人九嬪公主以下從者數百人升于頂
中廢諸淫祀特敬天神不在其例尋幸關口溫水登雞
頭山自射象牙簪一發中之勅示文武時太后得志逼
幸清河王懌淫亂肆情爲天下所惡領軍元義長秋卿
劉騰等奉明帝於顯陽殿幽太后於北宮於禁中殺懌
其後太后從子都統僧敬與備身左右張車渠等數十
人謀殺義復奉太后臨朝事不克僧敬坐徙邊車渠等
死胡氏多免黜後明帝朝太后於西林園宴文武侍臣
飲至日夕義乃起至太后前自陳外云太后欲害已及

騰太后答云無此語遂至于極昏太后欲攜帝宿宣光
殿言母子不相聚久今暮欲共一宿群臣不可左衛將
軍奚康生曰至尊陛下之兒隨陛下可也太后自起接
帝下堂去帝前入閣左右競相排閣不得閉康生奪手
牛刀斫之乃得定帝既升宣光殿康生乘酒勢將出虜
分殺義爲義所執光祿勳賈粲給太后口侍官懷恐不
安陛下宜親安慰太后適下殿粲即扶帝出東序前御
顯陽殿還閉太后於宣光殿義遂殺康生後劉騰死義
又寬息太后與明帝及高陽王雍爲計解義領軍太后

復臨朝大赦改元自是朝政疏緩威恩不立天下牧守
所在貪恠鄭儼汙亂宮掖勢傾海內李神軌徐紀等並
見親侍一二年中位總禁要手握王爵輕重在心宣淫
于朝爲天下所穢文武解體所在亂逆土崩魚爛由於
此矣太后自以失德懼爲宗室所嫌僧敬又因聚集宗
族遂泣涕諫曰陛下母儀海內豈宜輕脫如此太后大
怒自是不召僧敬內爲朋黨防蔽耳目明帝所親幸者
太后多以事害焉有密多道人能胡語帝置於左右太
后慮其傳致消息三月三日於城南大巷中殺之方懸

賞募賊又於禁中殺領左右馮臚少卿谷會紹達並帝
所親也母子之間嫌隙屢起鄭儼慮禍乃與太后計因
潘充華生女太后乃詐以為男便大赦為武泰元年復
陰行鴆毒其年二月明帝暴崩乃奉潘嬪女言太子即
位經數日見人心已安始言潘嬪本實生女今宜更擇
嗣君遂立臨洮王子釗為帝年始二三歲於是朝野憤
歎及爾朱榮稱兵渡河太后盡召明帝六宮皆令入道
太后亦自落髮榮遣騎拘送太后及幼主於河陰太后
對榮多所陳說榮拂衣而起太后及幼主並沈於河太
后妹馮翊君收瘞於雙靈寺孝武時始葬以后禮而追
謚曰靈

孝明皇后胡氏靈太后從兄冀州刺史盛之女靈太后
欲榮重門族故立為皇后明帝頗狂酒德尊嬖充華潘
氏后及嬪御並無過寵太后為帝選納抑屈人流時博
陵崔孝芬范陽盧道約隴西李瓚等女俱為世婦人有
訢訟咸見忿責武泰初后既入道遂居於瑤光寺

孝武皇后高氏齊神武之長女也帝見立乃納為后及
帝西幸關中降為彭城王韶妃

文帝文皇后乙弗氏洛陽人也其先世爲吐谷渾漢帥居青海號青海王涼州平后之高祖莫瓌擁部落入附拜定州刺史封西平公自莫瓌後三世尚公主女乃多爲王妃父瓌儀同三司兗州刺史母淮陽長公主孝文之第四女也后美容儀少言笑年十六文帝納爲妃及帝即位以大統元年冊爲皇后后性好節儉蔬食故衣珠玉羅綺絕於服玩又仁恕不爲嫉妬之心帝益重之生男女十二人多夭折唯太子及武都王戊存焉時新都關中務欲東討蠕蠕寇邊未遑北伐故帝結婚以撫

之於是更納悼后命后遜居別宮出家爲尼悼后猶懷猜忌復徙后居秦州依子秦州刺史武都王帝雖限大計恩好不忘後密令養髮有追還之意然事秘禁外無知者六年春蠕蠕舉國度河頗有言虜爲悼后之故興此役帝曰豈有百萬之衆爲一女子舉也雖然致此物論朕亦何顏以見將帥邪乃遣中常侍曹寵賈手勅令后自盡后奉勅揮淚謂寵曰願至尊享千萬歲天下康寧死無恨也因命武都王前與之決遺語皇太子辭皆淒愴因慟哭久之侍御莫能仰視召僧設供令侍婢數

十人出家手為落髮事畢乃入室引被自覆而崩年三十一鑿麥積崖為龕而葬神柩將入有二叢雲先入龕中頃之一滅一出後號寂陵及文帝山陵畢手書云萬歲後欲令后配饗公卿乃議追謚曰文皇后祔於太廟廢帝時合葬於永陵

文帝悼皇后郁久閭氏蠕蠕主阿那瓌之長女也容貌嚴夙有神智大統初蠕蠕屢犯北邊文帝乃與約通好結婚扶風王孚受使奉迎蠕蠕俗以東為貴后之來營幕戶席一皆東向車七百乘馬萬匹駝千頭到黑鹽池

魏朝鹵簿文物始至丁奏請正南面后曰我未也魏主故蠕蠕女也魏仗向西南我自東面孚無以辭四年正月至京師立為皇后時年十四六年后懷孕將產居於瑤華殿聞上有狗吠聲心甚惡之又見婦人盛飾來至后所后謂左右此為何人醫巫傍侍悉無見者時以為文后之靈產訖而崩年十六葬於少陵原十七年合葬永寧當會橫橋北后梓宮先至鹿苑帝輜輶後來將就次由折不進

廢帝皇后宇文氏周文帝女也后初產之日有雲氣滿

室茲盈久之幼有風神好陳列女圖置之左右周文曰
每見此女良慰人意廢帝之為太子納為妃及即位立
為皇后志操明秀帝深重之專寵後宮不置嬪御帝既
廢崩后亦以忠於魏室罹禍

恭帝皇后若干氏司空長樂正公惠之女也有容色恭
帝納之為妃及即位立為皇后後出家為尼在佛寺薨
竟無謚

孝靜皇后高氏齊神武之第二女也天平四年詔聘以
為皇后神武前後固辭帝不許與和初詔司徒孫騰司
空襄城王昶等奉詔致禮以后駕迎於晉陽之丞相第
五月立為皇后大赦齊巫禪降為中山王妃後降于尚
書左僕射楊遵彥

北齊

武明皇后婁氏諱昭君贈司徒內子之女也少明悟彊
族多聘之並不肯行及見神武城上執役驚曰此真吾
夫也乃使婢通意又數致私財使以聘已父母不得已
而許焉神武既有澄清之志傾產以結英豪密謀秘策
后嘗參預之及拜勃海王妃聞闈之事悉決焉后高明

嚴斷雅遵儉約往來外舍侍從不過十人性寬厚不妬
忌神武姬侍咸加恩待神武嘗將西討出師后夜孳生
一男一女左右以危急請追告神武后弗聽曰王出統
大兵何得以我故輕離軍幕死生命也來復何爲神武
聞之嗟嘆良久沙苑敗後侯景屢言請精騎二萬必能
取黑獺神武悅以告后后曰若如其言豈有還理得獺
失景亦有何利乃止神武逼於蠕蠕欲娶其女而未決
后曰國家大計願不疑也及茹茹公主至后避正室虜
之神武愧而拜謝焉曰彼將有覺願絕勿顧慈愛諸子

不異已出躬自紡績人賜一袍一袴手縫戎服以帥左
右弟昭以功名自達其餘親屬未嘗爲請爵位每言有
材當用義不以私亂公文襄嗣位進爲太妃文宣將受
魏禪后責之云汝父如龍汝兄如虎皆以帝王之重不
敢妄據云何一朝欲輒行舜禹之事彼是何人汝欲擬
之帝所以中止天保初尊爲皇太后宮曰宣訓濟南即
位尊爲太皇太后尚書楊愔等受遺詔輔政踈忌諸王
太皇太后密與孝昭及諸大將定策誅之下令廢立孝
昭即位復爲皇太后孝昭崩太后又下詔立武成帝大

寧二年春太后寢疾衣忽自舉用巫媪言改姓石氏四月辛丑崩於北宮時年六十二五月甲申合葬義平陵太后凡孕六男二女皆感夢孕文襄則夢一斷龍孕文宣則夢大龍首尾屬天地張口動目勢狀驚人孕孝昭則夢蠕龍於地孕武成則夢龍浴於海孕魏二后並夢月入懷孕襄城博陵二王夢鼠入衣下后未崩有童謠曰九龍母死不作孝及后崩武成不改服緋袍如故未幾登三臺置酒作樂宮女進白袍帝怒投諸臺下和士開請止樂帝大怒搃之帝於昆季次寔九蓋其徵驗也

蠕蠕公主者蠕蠕主郁久閭阿那瓌女也蠕蠕疆盛與西魏通和欲連兵東伐神武病之令杜弼使蠕蠕為世子求婚阿那瓌曰高王自娶則可神武猶豫尉景與武明皇后及文襄並勸請乃從之武定三年使慕容儼往聘之號曰蠕蠕公主八月神武迎於下館阿那瓌使其弟秃突佳來送女且報聘仍戒曰待見外孫然後返國公主性嚴毅一生不肯華言神武嘗有病不得往公主所秃突佳怨恚神武自射堂輿疾就公主其見將護如此神武崩文襄從蠕蠕國法蒸公主產一女焉

彭城太妃爾朱氏榮之女魏孝莊后也神武納為別室
敬重逾於婁妃見必束帶自稱下官神武迎蠕蠕公主
還爾朱氏迎於木井北與蠕蠕公主前後別行不相見
公主引魚弓仰射翔鷗應弦而落妃引長弓斜射飛鳥
亦一飛而中神武喜曰我此二婦並堪擊賊後為尼神
武為起佛寺天保初為太妃及文宣狂酒將無禮於太
妃太妃不從遂遇禍小爾朱氏兆之女也初為建明皇
后神武納之生任城王未幾與趙郡公琛私通徙於靈
州後適范陽盧景萃

上黨太妃韓氏軌之妹也神武微時欲聘之軌母不許
及神武貴韓氏夫已死乃納之

馮翊太妃鄭氏名大車嚴祖妹也初為魏廣平王妃遷
鄴後神武納之寵冠後庭生馮翊王潤神武之征劉蠡
升也文襄蒸焉神武還一婢告之二婢為證神武杖文襄
一百而幽之武明后亦見隔絕時彭城爾朱太妃有寵
生王子浹神武將有廢立意文襄求救於司馬子如子
如來朝偽為不知者請武明后神武告其故子如曰消
難亦姦子如妾如此事正可覆蓋妃是王結髮婦常以

父母家財奉王王在懷朔被杖背無完膚妃晝夜供給
視瘡後避葛榮同走并州貧困然馬屎自作靴恩義何
可忘夫婦相宜女配至尊男承大業又婁領軍勲何宜
搖動一女子如草芥况婢言可必信乎神武因使子如
鞫之子如見文襄尤之曰男兒何意畏威自誣因教二
婢反辭脅告者自縊乃啓神武曰果虛言神武大悅召
后及文襄武明后遙見神武一步一叩頭文襄且拜且
進父子夫妻相泣乃如初神武乃置酒曰全我父子者
司馬子如賜之黃金百二十斤文襄贈良馬五十疋

高陽太妃游氏父京之爲相州刺史神武剋鄴欲納之
京之不許遂牽曳取之京之尋死游氏於諸太妃中最
有德訓諸王公主婚嫁常令主之馮娘者子昂妹也初
爲魏任城王妃適爾朱世隆神武納之生浮陽公主李
娘者延寔從妹也初爲魏城陽王妃又王娘生永安王
浚穆娘生陽平王淹並早卒不爲太妃

文襄敬皇后元氏魏孝靜帝之姊也孝武帝時封馮翊
公主而歸於文襄容德兼美曲盡和敬初生河間王孝
琬時文襄爲世子三日而孝靜幸世子弟贈錦繡及布

帛萬匹世子辭求通受諸貴禮遺於是十屋皆滿次生
兩公主文宣受禪尊為文襄 皇后居靜德宮及天保六
年文宣漸致昏狂乃移居於高陽之宅而取其府庫曰
吾兄昔姦我婦我今須報乃淫於后其高氏女婦無親
踈皆使左右亂交之於前以葛為絙令魏安德主騎上
使人推引之又命胡人苦辱之帝又自呈露以示群下
武平中后崩祔葬義平陵琅邪公主名玉儀魏高陽王
斌庶生妹也初不見齒為孫騰奴騰又放棄文襄遇諸
塗悅而納之遂被殊寵奏魏帝封焉文襄謂崔季舒曰

爾由來為我求色不如我自得一絕異者崔暹必當造
直諫我亦有以待之又暹諮事上襄不假以顏色居三
日暹懷刺墜之於前文襄問何用此為暹悚然曰未得
通公主文襄大悅把暹臂入見焉季舒語人曰崔暹常
忿吾佞在大將軍前每言叔父合殺及其自作體佞乃
體過於吾玉儀同產姊靜儀先適黃門郎崔括文襄亦
幸之皆封公主括父子由是超授賞賜甚厚焉

文宣皇后李氏諱祖娥趙郡太子希宗女也容德甚美初
為太原公夫人及帝將建中宮高隆之高德正言漢婦

人不可為天下母宜更擇美配揚愔固請依漢魏故事
不改元妃而德正猶固請廢后而立段昭儀欲以結勲
貴之援帝竟不從而立后為帝好捶撻嬪御乃至有殺
戮者唯后獨蒙禮敬天保十年改為可賀敦皇后孝昭
即位降居昭信宮號昭信皇后武成踐阼逼后淫亂云
若不許我當殺爾兒后懼死之後有娠太原王紹德至
閣下不得見愠曰兒豈不知邪姊姊腹大故不見兒后
聞之大慙由是生女不舉帝橫刀詔曰爾殺我女我何
不殺爾兒對后前築殺奴德后大哭帝愈怒裸后亂搗

撻之后號天不已盛以絹囊流血淋漓投諸渠水良久
乃蘇以犢車載送妙勝尼寺后性愛佛法因此為尼齊
亡入關隋時得還趙郡段昭儀韶妹也婚夕韶妻元氏
為俗弄文壻法戲文宣文宣銜之後因發怒謂韶曰我
會殺爾婦元氏懼匿婁太后家終文宣世不敢出昭儀
才色兼美禮遇殆同正嫡後主時改適錄尚書唐邕王
嬪者琅邪人也嬪姊先適崔脩文宣並幸之數數降其
夫家超用脩為尚書郎薛嬪者本倡家女也年十四五
時為清河王岳所好其父求內宮中大被寵嬖其姊亦

通志北齊后妃傳一
俱進御文宣後知先與岳通又為其父乞司徒公帝大
怒先鋸殺其姪嬪時有娠過產亦從戮

孝昭皇后元氏開府元蠻女也初為常山王妃天保末
賜姓步六孤孝昭即位立為皇后帝崩從梓宮之鄴始
度汾橋武成聞后有奇藥追索之不得使闈人就車頓
辱降居順成宮武成既殺樂陵王元后被悶隔不得與
家相知宮闈內忽有飛語帝令檢推得后父兄書信元
蠻由是坐免官后以齊亡入周氏宮中隋文帝作相放
還山東

武成皇后胡氏安定胡廷之女其母范陽盧道約女初
懷孕有胡僧詣門曰此宅執盧中有月既而生后天保
初選為長廣王妃產後主日有鴉鳴於產帳上武成崩
尊為皇太后陸媪及和士開密謀殺趙郡王叡出婁定
遠高文遙為刺史和陸詣事太后無所不至初武成時
后與諸闈人褻狎武成寵幸和士開每與后握槊因此
與后姦通會武成崩後數出詣佛寺又與沙門曇獻通
布金錢於獻席下又挂寶裝胡牀於獻屋壁武成平生
之所御也乃置百僧於內殿託以聽講日夜與曇獻寢

通志北齊后妃傳二
處以獻為昭玄統僧徒遙指太后以弄曇獻乃至謂之
為太上者帝聞太后不謹而未之信後朝太后見二少
尼悅而召之乃男子也於是曇獻事亦發皆伏法并殺
元山王三郡君皆太后之所昵也帝自晉陽奉太后還
鄴至紫陌卒遇大風兼舍人魏僧伽明風角奏言即時
當有暴逆事帝詎云鄴中有急彎弓纏弣馳入南城令
鄧長顓幽太后北宮仍有勅內外諸親一不得與太后
相見久之帝迎復太后太后初聞使者至大驚慮有不
測每太后設食帝亦不敢嘗周使元偉來聘作述行賦

叙鄭并人段而遷姜氏文雖不工當時深以為愧齊
亡入周恣行姦穢開皇中殂

弘德夫人李氏趙郡李叔讓女也初為魏靜帝嬪武成
納焉生南陽王仁盛為太妃姊為南安王思好妃坐夫
反以燒死太妃聞之發狂而薨文宣五嬪及中人盧勣
义妹武成並以為嬪武成崩後胡后令二嬪自殺二嬪
悲哭後主為之惻愴私遺衣物令出外避焉盧生淮南
王後為太妃又有馬嬪亦得幸為后所妬自縊死彭藥
任祥並有女因坐父兄事皆入宮為文宣所幸武成以

彭為夫人生齊安王任生丹楊王並為太妃

後主皇后斛律氏左丞相光之女也初為皇太子妃後主受禪立為皇后武平三年正月生女帝欲悅光詐稱生男為之大赦光誅后廢在別宮後令為尼齊滅嫁為開府元仁妻

後主皇后胡氏隴東王長仁女也胡太后失母儀之道深以為愧欲求悅後主故飾后於東宮令帝見之帝果悅立為弘德夫人進左昭儀大被寵愛斛律后廢陸媼欲以穆夫人代之太后不許祖孝徵請立胡昭儀

為皇后陸媼既非勸立又意在穆夫人後忽於太后前作色言曰何物親姪女作如此語言太后問其言為何曰不可道固問之乃曰語大家云太后行多非法不可以訓太后大怒喚后出立剃其髮送令還家帝思見之每致詩以通意後與斛律廢后俱召入內數日而鄴不守後亦改嫁云

後主皇后穆氏名邪利本斛律后從婢也母名輕霄本穆子倫婢也轉入侍中宋欽道家姦私而生后莫知氏族或云后即欽道女也小字黃花後字舍利欽道婦妬

以輕霄面黥為宋字欽道伏誅黃花因没入宮有幸於
後主宮內稱為舍利大監女侍中陸大姬知其寵養以
為女薦為弘德夫人武平元年六月生皇子恆於時後
主未有儲嗣陸陰結符以監撫之任不可無主時皇后
斛律氏丞相光之女也慮其懷恨先令母養之立為皇
太子陸以國姓之重穆陸相對又奏賜姓穆氏胡庶人
之廢也陸有助焉故遂立為皇后大赦初有折衝將軍
元正烈於鄴城東水中得璽以獻文曰天皇后璽蓋石
氏所作詔書頒告以為穆氏之瑞焉武成為胡后造真
珠裙袴所費不可稱計被火所燒後主既立穆皇后後
為營之屬周武遭太后喪詔侍中薛孤康買等為平使
又遣商胡齎錦綵三萬疋與平使同往欲市真珠為皇
后造七寶車周人不與交易然而竟造焉先是童謠曰
黃花勢欲落清觴滿盃酌言黃花不久也後主自立穆
后以後昏飲無度故云清觴滿盃酌陸息駱提婆詔改
姓為穆陸大姬皆以皇后故也后既以陸為母提婆為
家不復顧念輕霄輕霄後自療面欲求見為大姬陸媪
使禁掌之竟不得見

馮淑妃名小憐大穆后從婢也穆后愛衰以五月五日
進之號曰續命性慧黠能彈琵琶工歌舞後主惑之坐
則同席出則並馬願得生死一處命淑妃處隆基堂淑
妃惡曹昭儀所嘗居也乘令反換其地周師之取平陽
帝獵於三堆晉州亟告急帝將還淑妃請更殺一圍帝
從其言識者以爲後主名緯殺圍言非吉徵及帝至晉州
城已欲沒矣作地道攻之城陷十餘步將士乘勢欲入
帝勅且止召淑妃共觀之淑妃粧點不獲時至周人以
木拒塞城遂不下舊俗相傳晉州城西石上有聖人跡

淑妃欲往觀之帝恐弩矢及橋故抽攻城木造遠橋監
作舍人以不速成受罰帝與妃度橋橋壞至夜乃還稱
妃有功勲將立爲左皇后即令使馳取禕翟等皇后服
御仍與之並騎觀戰東偏少却淑妃怖曰軍敗矣帝遂
以淑妃奔還至洪洞成妃方以粉鏡自玩後聲亂唱賊
至於是復走內參自晉陽以皇后衣至帝爲按轡命妃
著之然後去帝奔鄴太后後至帝不出迎淑妃將至鑿
城北門出十里迎之復以淑妃奔青州後主至長安請
周武帝乞淑妃帝曰朕視天下如脫屣一老嫗豈與公

惜也仍以賜之及帝遇害以淑妃賜代王達甚嬖之淑妃彈琵琶因絃斷作詩曰雖蒙今日寵猶憶昔時憐欲知心斷絕應看膝上絃達妃為淑妃所譖幾置於死達薨隋文帝將賜達妃兄李詢令著布裙配春詢母逼令自殺後主以李祖欽女為左昭儀進為左娥英裴氏為右娥英娥英兼取舜妃娥皇女英為名陽休之所制樂人曹僧奴進二女大者嘗忤旨剥面皮少者以善彈琵琶為昭儀以僧奴為日南王僧奴死又貴其兄弟妙達等數人同日皆為郡王為昭儀別起隆基堂極為綺麗陸媪誣以左道遂殺之又有董昭儀毛夫人彭夫人王夫人小王夫人二李夫人皆嬖寵之毛能彈箏本和士開薦入帝所幸彭夫人亦以音伎進死於晉陽造佛寺與總持相捋大李本隸戶女以五弦進小李即孝貞之女也小王嘗生一男毛兄思安驟升武衛董父賢義由軍主超登開府自餘姻屬多至大官

後周

文皇后元氏魏孝武之妹也初封平原公主適開府張歡歡姓貪殘遇后無禮孝武殺歡改封后為馮翊公主

通志卷之九十四 皇后傳二 九十三
以配文帝生孝閔帝魏大統十七年薨恭帝三年十二
月合葬成陵孝閔踐阼追尊為王后武成初又追尊為
皇后

文宣皇后叱奴氏代人也文帝為丞相納為姬生武帝
天和二年六月尊為皇太后建德三年三月崩五月葬
永固陵

孝閔皇后元氏名胡摩魏文帝第五子也初封晉陽公
主帝之為略陽公也尚焉不踐阼立為皇后帝被廢后
出俗為尼建德初武帝誅晉公護上帝尊號以后為孝

閔皇后居崇義宮周滅后出居里第隋大業十二年殂
明敬皇后獨孤氏太保衛公信之長女也帝之在藩納
為夫人二年正月立為皇后四月崩葬昭陵武成初追
崇為皇后明帝崩與后合葬焉

武成皇后阿史那氏突厥木杆可汗侯斤之女也突厥
既滅蠕蠕盡有塞表之地志陵中夏文帝方與齊人爭
衡結以為援侯斤初欲以女配帝既而悔之武帝即位
前後累遣使馬保定五年二月詔陳公純許公宇文貴
神武公竇毅南安公楊符等備皇后文物及行殿并六

宮以下一百二十人至俟斤牙所迎后俟斤忽改圖將
以后許蘇純等累請不得反命會雷風大起飄壞其穹
廬俟斤大懼以為天譴乃禮送后純等奉之以歸天和
三年三月至武帝接以親迎之禮后有姿貌善容止帝
深敬禮焉宣帝即位尊為皇太后大象元年二月改為
天元皇太后隋開皇二年殂年三十二隋文詔有司備
禮祔葬后於孝陵

武皇后李氏名娥姿楚人也于謹平江陵后家被籍没
至長安文帝以后賜武帝後得親幸生宣帝宣政元年
七月尊為帝太后大象元年二月改為天元帝太后七
月又尊為天皇太后二年二月尊為天元聖皇太后宣
帝崩靜帝尊為大帝太后隋開皇初出俗為尼名常悲
八年殂以尼禮葬于京城南

宣皇后楊氏名麗華隋文帝之長女也帝在東宮武帝
為帝納后為皇太子妃宣政元年閏六月立為皇后帝
後自稱天元皇帝號后為天元皇后尋又立天皇后及
左右皇后與后為四皇后二年二月詔以后取象四星
於是后及三皇后並加大焉冊授后為天元大皇后又

立天中大皇后與后名約五皇后焉后性柔婉不妬忌四
皇后及嬪御等咸愛之而仰之帝後昏暴滋甚喜怒乖度
嘗譴后欲加之罪后准止詳閑辭色不撓帝大怒賜后
死逼令引決后母獨孤氏詣閣陳謝叩頭流血然後得
免帝崩靜帝尊后為皇太后居弘聖宮初宣帝不豫詔
隋文帝入禁中侍疾及大漸劉昫鄭譯等因矯詔以隋
文帝受遺輔政后初雖不預謀然以嗣主幼冲恐權在
他族不利於已聞昫譯已行此詔心甚悅後知隋文有
異圖意頗不平及行禪代憤怨愈甚隋文內甚愧之開

皇初封后為樂平公主後又議奪其志后誓不許乃止
大業五年從煬帝幸張掖殂於河西詔還京所司備禮
祔葬后於定陵

宣帝后朱氏名滿月吳人也其家坐事沒入東宮宣帝
之為太子后被選掌衣服帝召幸之遂生靜帝大象元
年四月立為天元帝后七月改為天皇后二年二月又
改為天大皇后后本扶良家子又年長於帝十餘歲踈
賤無寵以靜帝故特尊崇之班亞於楊皇后焉宣帝崩
靜帝尊后為帝太后隋開皇初出俗為尼名法靜六年

殂以尼禮葬于京城西

宣帝后陳氏名月儀自云潁川人大將軍山提之第八女也大象元年六月以選入宮拜為德妃月餘立為天左皇后二年二月改為天左大皇后頃之又詔以坤儀比德土數惟五四大皇后外增置天中大皇后一人於是以后為天中大皇后帝崩出俗為尼名華光永徽初終山提本爾朱兆之隸仕齊位持進開府東兗州刺史謝陽王武帝平齊拜大將軍封浙陽公大象元年以后父超授上柱國進鄒國公除大宗伯

宣帝皇后元氏名樂尚河南洛陽人開府晟之第二女也年十五被選入宮拜貴妃大象元年七月立為天右皇后二年二月改為天右大皇后帝崩出俗為尼名華勝初后與陳皇后同時被選入宮俱拜貴妃及升后又同日受冊帝寵遇二后禮數均等年齒復同特相親愛及為尼後李末及尉遲后並相繼殞沒而二后貞觀中尚存晟少以元氏宗室拜開府大象初以后父進位上柱國封翼國公

宣帝皇后尉遲氏名繁熾蜀公迥之孫女也有美色初

適杞公亮子西陽公温以宗婦例入朝帝逼幸之及亮
謀逆帝誅温皇后入宮拜長貴妃大象二年三月立為
天右大皇后帝崩出俗為尼名華道隋開皇十五年殂
靜帝司馬皇后名令姬柱國滎陽公消難之女也大象
元年二月宣帝傳位於帝七月為帝納后為皇后二年
九月隋文帝以后父奔陳廢為庶人後嫁為隋司州刺
史李丹妻貞觀初猶存

隋

文獻皇后獨孤氏諱伽羅河南洛陽人周大司馬衛公

信之女也信見文帝有奇表故以后妻焉時年十四帝
與后相得誓無異生之子后姊為周明帝后長女為周
宣帝后貴戚之盛莫與為比而后每謙卑自守及周宣
帝崩隋文居禁中總百揆后使李圓通謂文帝曰騎虎
之勢必不得下勉之及帝受禪立為皇后突厥嘗與中
國交市有明珠一篋價直八百萬幽州總管陰壽白后
市之后曰當今戎狄屢寇將士罷勞未若以八百萬分
賞有功者百寮聞之畢賀文帝甚寵憚之帝每臨朝后
輒與上方輦而進至閣乃止使宦官伺帝政有所失隨

時匡諫多所弘益候帝退朝而同反宴寢相顧放然后
早失二親常懷感慕見公卿有父母者每為致禮焉有
司奏曰周禮百官之妻命於王后憲章具在請依古制
后曰以婦人與政或從此漸不可開其源也不許后每
謂諸公主曰周家公主類無婦德失禮於舅姑離薄人
骨肉此不順事爾等當誡之后姑子都督崔長仁犯法
當斬文帝以后故免之后曰國家之事焉可顧私長仁
竟坐死異母弟施以猫鬼坐壘祝詛於后坐當死后三
日不食為之請命曰施若無政害民者不敢言今坐為

妾身請其命施於是減一等后雅性儉約帝常合止利
藥須胡粉一两宮內不用求之竟不得又欲賜柱國劉
嵩妻織成衣領宮中亦無上以后不好華麗有齊時七
寶車及鏡臺絕巧麗帝使毀車而以鏡臺賜后后雅好
讀書識達今古凡言事皆與上意合宮中稱為二聖嘗
夢周阿史那后言受罪辛苦求營功德明日言之上為
立寺追福焉后兄女夫死於并州后嫂以女有娠請不
赴葬后曰婦人事夫何容不往其姑在宜自諮之姑不
許女遂行后頗仁愛每聞大理決囚未嘗不流涕然性

尤妬忌後宮莫敢進御尉遲回女孫有美色先在宮中
帝於仁壽宮見而悅之因得幸后伺帝聽朝陰殺之上
大怒單騎從苑中出不由徑路入山谷間三十餘里高
頰楊素等追及扣馬諫帝太息曰吾貴爲天子不得自
由高頰曰陛下豈以一婦人而輕天下帝意少解駐馬
良久夜方還宮后候上於閣內及帝至流涕拜謝頰素
等和解之上置酒極歡后自此意頰折初后以高頰是
父之家客甚見親禮至是聞頰謂已爲一婦人銜之又
以頰夫人死其妾生男益不喜之漸加譖毀帝亦每事唯

后言是用后見諸王及朝士有妾孕者必勸帝斥之時
皇太子多內寵妃元氏暴薨后意太子愛妾雲氏害之
由是諷帝黜高頰竟廢太子立晉王廣皆后之謀也仁
壽二年八月甲子日暈四重己巳太白犯軒轅其夜后
崩於永安宮時年五十九葬於太陵其後宣華夫人陳
氏容華夫人蔡氏俱有寵帝頗惑之由是發疾及危篤
謂侍者曰使皇后在吾不及此云

宣華夫人陳氏陳武帝女也性聰慧姿貌絕好及陳滅
配掖庭後選入宮爲嬪時獨孤皇后性妬忌後宮罕得

進御唯陳氏有寵煬帝之在藩也陰有奪宗之計規為
內助每致禮焉進金蛇金駝等物以取媚於陳氏皇太
子廢立之際頗有力焉及文獻皇后崩進位為貴人專
房擅寵主斷內事六宮莫與為比及帝大漸遺詔拜為
宣華夫人初帝寢疾於仁壽宮夫人與皇太子同侍疾
平旦更衣為太子所逼夫人距之得免歸於上所上怪
其神色有異問之夫人泣以實對帝恚曰畜生何堪付
大事獨孤誠誤我意謂獻皇后也因呼兵部尚書柳述
黃門侍郎元巖曰呼我兒述等呼太子帝曰男也述巖

出閣為勅書訖示左僕射楊素素以白太子太子遣
衡入寢遂令夫人及後宮同侍疾者並就別室俄而上
崩夫人與諸後宮相顧曰事變矣皆色動股慄晡後太
子遣使者齎金合帖紙於際親署封字以賜夫人夫人
見惶懼以為鴆毒不敢發使者促之乃發見合中有同
心結數枚諸宮人相謂曰得免死矣陳氏恚而却坐不
肯致謝諸宮人共逼之乃拜使者其夜太子蒸焉煬帝
即位出居仙都宮尋召入歲餘而終時年二十九帝深
悼之為製神傷賦

容華夫人蔡氏丹楊人也陳滅以選入宮爲世婦容儀
婉嫵帝甚悅之以文獻后故希得進幸后崩漸見寵遇
拜爲貴人參斷宮掖亞於陳氏帝寢疾加號容華夫人
帝崩後亦爲煬帝所蒸

煬帝愍皇后蕭氏後梁明帝歸之女也荆揚間以二月
生子者不舉后以二月生由是季父收養之未幾及
夫妻俱死轉養舅張軻家軻甚貧窶后躬親勞苦煬帝
爲晉王文帝選妃於梁卜諸女皆不吉歸乃迎后於
氏使者占之曰吉遂冊爲妃后性婉順有智識好

解屬文頗知占候文帝大善之煬帝甚寵敬焉及帝嗣
位立爲皇后帝每游幸未嘗不隨從時后見帝失德心
知不可不敢措言因爲述志賦以自寄其意及帝幸江
都臣下離貳有官人白后曰外間人人欲反后曰任汝
奏之官人言於帝帝大怒曰非汝宜言乃斬之官人復
白后曰宿衛者往往耦語謀反后曰天下事一朝至此
大勢已然無可救者何用言徒令帝憂煩耳自是無復
言者及宇文化及之亂隨軍至聊城化及敗沒於竇建
德建德妻曹氏妬悍煬帝妃嬪美人並使出家并后置

於武彊縣是時突厥處羅可汗方盛其可賀敦即隋義
城公主也遣使迎右建德不敢留遂攜其孫正道及諸
女入於虜庭唐貞觀四年破突厥皆以禮致之歸于京
師賜宅於興道里二十一年殂詔以皇后禮於揚州合
葬於煬帝陵謚曰愍

后妃傳第二

通志二十

